

海甯渤海陳氏宗譜

254

3815

18

海寧縣志卷二十八

孫賡笙編輯

十七世孫德錦採刊

海寧縣志



十四世國子監典籍重遇鹿鳴銚齋公

公諱廷獻字銚齋宋齋公之大宗元孫幼聰慧弱冠補博士弟子員再應鄉試而中式公車四上三膺薦以大桃二等選遂昌教諭任滿調蘭溪文名震一邑請業者前後百餘人皆名士所交悉通博吟詠不輟著有玉樹齋初二集性灑脫無拘迂習年八十司鐸蘭溪已二十五載上游器重保授國子監典籍以年老不赴旋里閉戶著書矍鑠似中年行不携杖鬚髮蒼而齒未搖燈下猶能書



海濱漫錄 卷之二  
一  
蠅頭楷道光辛卯公年八十三計舉鄉已一週甲擬秋日偕新貴  
同宴鹿鳴縣令已通詳各大憲四月上旬忽染時恙數日而逝公  
性坦蕩一生不以功名介懷獨於重宴鹿鳴則喜動色笑天不假  
以日月惜哉邑志載藝苑傳



十四世分水教諭吉齋公

公諱敬勝字尚箴號吉齋父趾齋公天性孝友教子姪礪行均成立公承父志與兄及弟孝友終身撫從子女如己出不分析偕從兄弟旦夕聚首無間言十六游庠旋中副車不期蹀進惟日坐書巢與兄弟子姪輩講性理讀漢書境貧篝燈自樂若不知衣食之莫繼者終身不衣綢綾值仗義事則欣然起從弟雪圃孝廉義舉敦本會勸族人集錢與產以卹貧歿之無以殮與殤之無以瘞者公首捐北古蕩之蕩為長歿故南臺頭之地為幼殤故復以身坊石角橋田三畝為助曾祖貞齋公支下議建享堂限以地積錢囑公經收公年當古稀慨然曰老年而收存公錢旦夕不測負先



人亦以負族人也以遐坊膏腴田柒畝零抵公家錢五十緡入祭  
產曰價不求足願後人高堂有成以斯田廢有贏而無絀則幸甚  
仗義皆出自孝友真性也晚年選授分水教諭正欲措資考驗適  
患喘急疾拂然曰學校士子猶子弟也以殘疾人膺其職不克勵  
學士子奚異為父兄而不能率子弟乎遂不赴壽七十三而終歿  
後堂弟若卿茂才推公孝友之誠合兄與弟並營穴於諸公亭祖  
父穆次



十四世太常博士雪圃公

公諱石英字子敬號雪圃分水教諭潔齋公第三子 贈文林郎  
采南公嗣次子也幼好學逾常歸自塾手不釋卷夜將寢則識書  
數行默誦數十遍晨起背讀無悞且性沉靜其於說文勾股靡不  
研究未弱冠補博士弟子員乾隆戊申第二十八名登鄉榜先是  
癸卯伯兄寶摩公膺鄉薦後先輝映僅逾五年公手足情愛最摯  
公車北上壘篋互協留京九載嘉慶丁巳寶摩公選山陰學博遂  
與偕歸壬戌入都復報罷截取知縣改就京職自此絕意進取計  
先從八上春官其間南北馳驅非設教鄉里即就館京師惟日握  
管為生徒塗乙文字操觚之士咸樂承其謦欬授徒四十年及門



成名者如海昌查又山給諫吳子律學博許珊林太守以及姪婿  
朱仁山郎憲堂弟笠兩刺史尤其卓卓者行文以理法清真為主  
力掃浮靡餽飭之習識者擬之江西派所著文集談舉業者奉為  
圭臬平居教子姪以務本為重嘗舉太高祖宋齋公遺訓以為誠  
曰孝弟忠信為人本心文則猶衣裳也苟惟文是尚昌黎所謂馬  
牛而襟裾耳故必讀書以明理方能力行而不倦一切放僻邪侈  
之事自不足櫻其心矣公家固貧賴脩脯以資薪水值戚好窘於  
喪葬則仗義為之助七秩稱觴同學製錦為壽文有云霜嚴律已  
則嗇甚窶人雲量處衆則奢於巨室洵不誣也公長子仲玉早下  
世以寶摩公次孫元義為嗣孫親為課讀童試三冠軍復納進室



舉丈夫子三以次均入庠人咸謂教育人才之報云



十四世文學若卿公

公諱祖綬號若卿宗齋公長房之元孫生十旬而失恃撫於媣不乳食體弱而善病三歲尚不能起立六歲患天痘左目失明由是常在床蓐至十歲而精神稍振始得認之無過目不忘及弱冠十三經已遍誦作文亦斐然試膺前茅迨學院按臨已患瘵五年餘甫瘥年二十八補博士弟子員查又山給諫公父二有公之門人也慕公才延課伯子玉彭郎憲次子騫雲中翰十餘載同邑黃韻山名孝廉亦遙從三人均先後舉於鄉公以自幼質弱中年即患手振舉筆須兩手捧故歲試僅一至即報病時嫡兄銜齋公從兄雪圃公俱為邑名孝廉公屬文伯仲其間從叔秋江明府表弟朱



尚齋太守爭延課子弟受業者均成名年逾週甲姪孫琴齋孝廉  
猶敦請訓子當其朱尚齋太守延至任所也歷宿遷瑞州所至皆  
即景吟咏並繪山水之勝景名曰皖道真景惜遭兵火書燬而不  
傳平生所讀之書至老不忘寢疾亟值 萬壽聖誕合邑懸燈堂  
姪心齋茂才外孫陸建堂孝廉坐於床湖論萬壽典有不知所出  
時公已絕食旬餘聆而呼曰此在儀禮某頁某行甫黎明而易簣  
終身不倦學如此嗚呼以公之穎悟聰慧若是適不為病癘擾上  
進必不可限天殆忌其才而以疾阻乎當時達者皆曰天或留其  
餘以貽後未可知也壽終六十有九



十五世禮部儒士稷堂公

文學若卿公之長子名思文號稷堂有幹才言忠信因貧廢學游  
歷東魯燕京二十餘載其至東魯也以同里表叔尚齋朱公為東  
昌守留司賑事有疑議必商決有委任必竭誠無稍假推其至燕  
京也姻戚曹東井刺史有貿易勞倩公輔行值風霜亦奮發而往  
遇寒暑亦拚力而前不辭勞瘁同郡李竹村當漢筆帖羨公才援  
充禮部漢筆帖歷儀制司補儒士正以期滿議叙適曹君選桂嶺  
刑司偕出都擬與赴粵以資竭不果歸而為戚姓典籍戚富而懦  
且年少遇人侵擾必奮身以膺十餘載戚免人凌家得亦保病革  
始謝別方曹東井刺史三代殉節耗至公號洵曰惜吾不與行以



至遭奇慘若此設果與行必有以保弱息斷不令三世一時同斃至是也忠信之踐於此可見公善隸書乾道間嘉興張叔未首解同里張石匏茂才黃椒升貳尹禾郡稱三隽公之書亦不亞因久客他鄉兼遭兵火留傳者鮮生平代人作事無不盡己之才以任勞不第朱曹二君之信任卓卓為衆聞已焉逢時不幸逆氛親值至鬱抑以終



十五世益課議叙惠堂公

明字行列文號惠堂文學若卿公次子分水司鐸吉齋公承祧嗣子也慷慨好施孝友於兄弟屢試未售性曠達不斤斤於舉業當嘉所引商和氣待人不思利己浼求無不遂貧窶無不卹戚族交游待以舉火者凡幾道光季年人心思亂梟匪四起鹹業不振商多賠累致傾其家公自若不以窘形色慷慨得天真也方當弱冠娣嫁同里陸氏病歿壻遠出遺甥世勳孝廉僅七齡寶樞茂才祇三月公長為之教次為之撫以舅氏代母氏勞後俱成名本生兄客都嫂氏貧病公於此時已值鹹務賠累產蕩而家破矣猶勉力醫藥歿為盡禮兩姪幼貧撫誨不怠若不知己之衣食惟艱也世



風澆薄有誚其孝友之無為公則付之一笑嗚呼貧不啻情之常  
 利舍親人之分公則貧而好施不至利勿舍親且困仍濟親也慷  
 慨性成孝友天籟公之嗣祖父皆孝友於家及公三世想其天籟  
 有自來也

*(Faint bleed-through text from the reverse side of the page)*



十五世議叙縣尉掄伯公

公名嗣遠司寇丙齋公之來孫大宗伯清恪公之嗣來孫孝慈秉性存也境貧不業儒經理各墓祭產竭誠盡瘁俸外不侵用一錢逆擾時東陳兩墓有遠族串匪砍蔭公聞信身阻受窘幾危雖終不得保忘身不避危險其孝思非出自真誠不能也化龍騎塘及秦山西兜諸墓承平後俱凌夷不堪公芟荆棘理瓦礫坍塌者修葺之廢頽者整理之不數年規範漸復事本身叔為之養為之喪且為之葬撥孫承嗣一切全禮從姪子莊觀察捐創義莊葆齋姪主謀其事公與葆齋從叔姪而親愛者事事必商確而行善舉章程大半由公商訂化龍騎塘兩墓兵燹後化龍半蕪騎塘則一



片榛棘公創建坟丁屋五楹募丁管守凡事竭誠整理孜孜矻矻後  
經理以漸行復初為念歿相邇猶函達經理敦勉獎勸本生親房  
未葬十餘棺時新立義莊已有埋葬之費公措資而瘞不取求義  
莊訓諸子曰我為董事不欲以公家錢葬我親房使公費竭蹶也  
臨終猶因葬務負倩數十金嗚呼我家世有孝慈兵劫以來不概  
見公真我家孝慈之尤者也



十六世賜卹雲騎尉文齋茂才

文齋名其炳行齋茂才子自幼聰慧極盡孝道弱冠應試即列前茅補嘉郡庠弟子員鄉試屢薦見愛於祖母少失恃撫於繼母曾侍繼母一如所生屢游本省大憲幕不獨賓主契合凡經國大事無不力為贊襄繼母存必歲一歸省竭盡旨甘凡當道奏牘所入必與商確定稿僉曰忠臣必出自孝子也杭城初陷時寓紫陽書院幾罹災幸即復得無恙歸以繼母年老鋒烟逼邇避氛於鄉會以繼母病居鄉不適歸家未幾城陷倉猝不及避負繼母由南門出眷屬步隨未半里為逆所窘猶負繼母與逆巷戰身受數十刃氣絕猶手執母衣次女二姑亦觸石斃子德儀被擄當道先後奏



聞初得 旨以馬兵陣亡例 賜卹偕次女並建祠坊繼以五品  
官陣亡例 賜襲雲騎尉三代文齋才敏學博早為世所欽佩而  
其忠忱久抱孝思不匱臨危而不舍母受創而不惜身豈易人任  
乎宜 國恩之疊沛也



十六世子莊通奉墓志

東閣大學士兩江總督二等恪靖侯湘陰左宗棠撰文

大寇起桂管連剋九域郡縣吏聞風輒誑潰賊鋒所指雲擾波決所嚮不支有以儒官奮蹕而出危樞戎幕閒料饒耀兵無譁無餒左拏右拒必縋而蘇卒剋名城過渠醜宜陳功膺上賞挾奇不遽雙言割榮甘默若陳君者不誠人傑矣哉君諱其元字子莊晚自號庸閒先世出宋高武烈王始祖諒自黃山占籍海甯養於陳承其姓遂為海甯陳氏自文簡文勤趾武入相玉珂金車族望冠海內文簡從子諱世修康熙癸巳舉人遂昌教諭君支祖也三傳至諱善繼者官直隸知縣為君曾祖祖諱萬森官太平府知府考諱鰲官福建同安縣知縣曾祖妣氏史祖妣氏王妣氏任三代均封贈



如例君幼孩多奇美儀觀桀然負康濟畧先後侍官所承家問多  
文以粟未幾為弟子員譔策籌邊林文忠歸其閔達一旦譽起公  
卿閒俄而太平公徂逝贈公棄官歸膺家閔清寒瑩骨君蝸蝸亦  
立授經為養省試十五役連被放議叙訓導選金華久之擢富陽  
教諭在官十八年德業迪士士奮於學值邑災勸分俵振境無捐  
瘠無何粵逆殘江南波浙壤君憫然守禦鞞刀韜首不自弛置事  
平叔知縣在任法銓加秩同知賞孔雀翎既賊烽自三衢颺至省  
垣再陷時君已注官江蘇亟奉贈公避兵山中延緣走滬瀆茹辛  
漬苦始得達贈公道逝嫗息嗣萎愉一憂百強自振厲居閒鬱伊  
恤恤乎身世不復持控至是謁今相國李公檄募偏師規甬東復



辦裝未行也遽遭喪係然幾滅性亟延入幕參軍謀繼復薦佐甯  
紹道史君治軍浙東軍有聲屬予督師入浙偉君才思奏其最於  
朝顧君方牒辭改原官予益歎君潔退為不可及遂密疏入告詔  
以直隸州知州發江蘇君之至也大吏刮目視委司海運筦權稅  
未久檄調南漕地藥而躑君夙夜勵精以鄉堡遠近定傳訊期日  
用編審法日榜六事一月判三百八十餘牘屬有番舶販石炭觸  
礁而碎民爭拾漂棄夷以焚掠告責償巨萬顛顛要挾君堅據不  
應夷却去時豐潤丁公方撫吳壯君吏材移權青浦邑境園三泖  
中雨淫壞民田君銳心水利仿孫耕遠築圩法行之縣西瀕湖田  
歲沈浸田亡糧存民苦之君力行清丈兼并以息旋署新陽未幾



調上海上海故江南壯縣江海匯流華彙糅雜君憤悱於蹶蹇中  
挈鉅持細擘畫翔實事有涉中外辟感者不難於勢必據理折之  
用是聲望奮張積勞晉階知府加秩道員蓋君身足以幹事誠足  
以格頑計必洞微芒慮必周章蒞故所至蘄蘄有所見而予尤偉  
君乞就教職事為有古人廉靜之風負乎不可躋已君性神禪不  
慕榮願試吏十載時南嚮思歸及是駸駸將宦達遽引退寄孳桐  
鄉貞素自逸然有關鄉邦利病者必竭心力為之自奉儉嗇為宴  
人所不堪而與人無恠敦族誼勗義莊以贍子姓接人以和所不  
可輒義形於色事過即已聞者灑如也晚自序履迹甚備可無贅  
述君生於嘉慶十七年二月二十日卒於光緒七年七月初三日



年七十配聞夫人先卒子四德澹賞戴花翎知府用江蘇同知德

嵩邑庠生德錫德大殤女子子十一均適士族孫五彭壽邑庠生

益壽宜壽福壽昌壽俱幼讀曾孫一爾熾君卒逾年君之孤德澹

將卜葬於石門之先期來徵銘予重來江南尚芋乎君舊

治乃為銘曰吏與儒官何易何難儒嵬吏俗世也吠姍惟君瘡瘡

急俗所緩平進不頗華問彌遠於今則秘在古奚奇匪秘匪奇來

者之師有苑者山有汚者水鑽石鑿詞永奠幽址



十六世華亭令勉齋運判

勉齋名基懋由嘉郡庠生中咸豐戊午舉人學宗理法性尚和平  
中年失怙以處館為生計遭粵逆亂避兵粵東同里查子南大令  
慕其才延於豐順幕閱試卷以公郎初婚指腹訂姻查與我家世  
為姻戚由是益增姻婭益邑顧鑑堂都轉亦羨其和藹博學敦請  
課子各大員爭欲攀延群慨不及勉齋之誠厚和平通經博識見  
重於時如此兩赴春官不售同治壬申大挑一等簽發甘肅時鋒  
烟甫靖甘省猶有猺匪且距家途遙諸戚友咸以指省勸勉齋則  
毅然往至省左制軍喜曰我以為浙人生文秀之邦高安富之樂  
何亦甘受此風霜辛苦而跋涉來前遂留帳佐筆墨甫三月即委



署華亭邑事華亭新復之區苗居九而民居一加以兵荒之後人  
益強悍勉齋一以和平處之期年而邑大治恢復之初鄰邑令大  
都以鋒利送往滋事華亭以和平治而苗民帖服旋援例遷兩  
淮益運判赴都引見假歸展墓疊遭長子婦反幼子冢孫殤仍  
以和藹自守不為憂戚形色逾年赴省鹹憲皆企重之方欲任事  
遽以病歿生平以和氣待人不矜才不恃氣於兄弟行尤篤愛好  
週人急兵燹後人情叵測以忠厚濟人之危受恩者反以已之過  
貽之而自居長勉齋亦一晒而不與較其藹然可親如此宜其臨  
厄則見重於戚友出仕則邀譽於上官也天不永其年未能置身

通顯良可悲夫



十四世太學滙安公配殉節蘇節婦

節婦花溪太學生蘇立如公女年二十來歸我太學諱理燮號滙安不七年滙安公患時疫歿遺子僅二齡鞠育成立為之娶平生儉約逾人待諸姪諸從孫輩均如己出節操三十餘載不苟言笑柳莊公後子姓大都聚居於莊裏設有爭端節婦一言即解族無親疏必循善教導咸豐辛酉粵氛甚適合村人均逃避四散節婦獨安居不動勸之偕行必力辭曰我家居數十年未嘗遽出戶今因寇逼而徙我身何自輕乎人俱有身家宜避也我貧如洗而無兒女之纏亦欲保身而逃我身何自重乎且大眾都去毗連數十家應門莫策而甘於棄先人之故居使大眾歸慨無巢乎寇屢至



俱自若匪有舉火焚屋者必長跪求免甚至米粒掠盡日不一餐  
猶強步往還環視前後村舍必令無所損壞而後已二三年間寇  
擾無已莊之左右不至遭匪炬者皆節婦之力也癸亥臘月中旬  
一日寇猝至居宅被寇數舉火節婦數奪其火具寇憤甚連砍數  
十刃體無完膚而歿嗚呼節婦貞操為閭里所共仰遭時不幸復  
殉身於逆匪之斫令人聞之而慘何可道也粵逆之災四顧屋廬  
半被煨燼而莊裏陳氏成村使非節婦之困守力爭其能完善如  
是乎迄今居先人之宅者感戴宜何如也節婦守乎貞而死乎過  
誕子成家夫婦不祿從子錫璋子其驟奉祀又以居遠城郭州士  
人採訪所不及至大節久湮未彰悲夫



十七世殉節王孺人字朱貞姑

王孺人杭州茂才王福昌女本房蓮峰公外孫女歸孝廉其泰長媳茂才德性溫厚曉詩書明大義咸豐辛酉逆擾城陷閣家倉猝夜避孺人與已字未嫁夫妹貞姑約曰逆氛伊邇我二人素不出戶與其拋頭露面以貽羞不若守貞誓死而靜處逆果來不稍移時翁外出姑持家孺人與貞姑勸諸人行謹閉門戶未幾鎗炮聲邇並繼於密室越三日逆退夫歸殞殮以禮斯一劫也族中罹禍者共十人孺人和貞姑青年偕逝慘何可言同里徐侍郎以殉節上聞蒙 恩賜卹建十殉節坊祠以褒之



海甯渤海陳氏宗譜卷

十五世孫賡笙編輯

十七世孫德錦校刊

續修外傳

第十四世山陰教諭寶摩公

公諱石麟號寶摩分水教諭潔齋公之長子也公生而魁梧岐嶷自幼不苟言笑秉性沈毅與人接物則謙謙藹如也弱冠游庠詩文雄厚名震一時善書法晉唐宋元無所不長乾隆癸卯科以經魁舉於鄉禮部試報罷考取咸安宮教習期滿以知縣用注改教職丁巳選授山陰縣教諭時公正在壯年都中戚族顯宦咸以改教為公惜公則淡泊為懷以為一行作吏案牘繁心豈得以詩文



自樂乎既不能簪筆隨朝不若首藉一盤差有風味俶裝歸里擬  
擋赴任山陰為紹郡首邑多積學士僉慕公名以詩文進者日不  
暇接公亦喜獎掖後進來者不拒與知名士會詩文於學署顏其  
所居曰小信天巢以先世高菊礪公有信天巢之築故云凡寒士  
干求必應有門下士某家寒母亡無以為殮向公求濟值公囊涸  
無以應戲仿劉文清公書條幅予之人莫辨真偽售得重值藉以  
殮殮一郡傳為佳話山陰士風澆薄俗又好訟而庠序敗類有藉  
以刀筆為業者公懸厲禁犯則詳草士之不端過小者諄諄化導  
一學之中無不畏公之威愛公之德不數年而風俗頓改朴厚鄉  
人有涉訟者不之縣而之學揮使去則曰陳老師為吾等一言決



城次年癸酉六十誕辰懸弧於家山陰門生耆舊之來會亦如其德之深入於人如此公友于甚篤次第常博雪圃公諱石英出嗣堂叔諱紫芝後其長子諱高森早亡無後數言於公欲擇嗣孫公以雲伯公祇一子聲叔府君出嗣於胞弟子實府君後已有二子任其擇必欲子實府君長孫諱元義為孫公曲徇之然兩代轉輾出嗣已出五服矣雪圃公已既出嗣理應遷歸嗣父以奉祭祀因彼居湫溢以兄弟不忍相離為詞公即允其同居焉又以身死不忍離本生父母欲在分水公墓旁劃一地以營葬公亦曲允之故雪圃公之墓在分水公墓左也初公在山陰任以數為六藝之一家學淵源于孫不可廢棄爰將遷祖宋齋公所著勾股述勾股



引蒙等書親自校刊存板於守仁堂後遭粵匪難與屋俱燬可慨也晚年歸田作詩文會於家月必族戚弟姪咸集杭紹二郡之士有遠來赴會者極一時之盛不一年而遽卒時彥無不惜之著有小信天巢詩文集二十四卷行世駒谷書屋雜記隨筆等數十卷未刊燬於兵燹卒於嘉慶甲戌閏二月十八日年六十有一歲遺命葬分水公墓後與子實府君同穴以已受分田地作祭產焉贊曰公處國朝全盛之世家門鼎盛之後身負時望而退處恬淡一生抱負小試於首蓓盤中其經濟已可觀矣苟能遭際隆遇大展才猷安知其不能與沈文恪阮文達媲美乎孔子曰是亦為政奚其為為政是公之處世也乎



十四世深州刺史笠雨公

公諱希敬字櫟餘號笠雨一號脊甫綏甯令贈中憲大夫秋江公第四子也幼聰穎讀書五行並下長屬文不屑屑於時俗應童試時其於金陳章羅諸大家靡不窮究堂與嘉慶甲戌縣試邑令嘉魚張君宗軾竒其才首拔之以冠軍迨學使者至亦取以冠郡庠焉丙子鄉試公初入棘闈試作極得意諸老宿閱其文頗為心折榜發果獲雋蓋公於舉業實有心得故取科第如操左券云嗣屢上春官皆薦而未售癸未會試始捷南宮以知縣籤發江蘇補金壇令課士愛民興利剔弊循聲卓著邑有地痞莊五可者犯案拒捕公密拘而寘諸典邑人稱快調江陰令江邑為人文淵數江



蘇學使衙舍在焉公蒞任後敷政之暇尤以提倡後進為己責故  
學使者恆重視公丙申會試邑人夏子齡獲首選亦出公門下其  
所沾溉者深矣會當膺卓異適丁外艱歸已亥服闋選直隸高陽  
令調任邢臺令畿輔諸邑土瘠民貧公下車後教養備至大吏以  
公能膺繁劇調補宛平令宛平為京畿首邑非才猷煥發者弗克  
勝此職公則黽勉從事游刃有餘蓋汪汪千頃陂固不可以斗石  
計也任滿擢深州牧當咸豐癸丑之春賊由楚湘陷金陵東南傾  
動公在深州署聞賊蹙鳩張恆慷慨縱談髮植眦裂八月初賊分  
股由豫而晉轉趨畿甸公即募勇為備第承平日久民不知兵公  
與二三知己論及時事搯掖歔悲憤交集與城存亡公此時已



有決志已九月賊自邢洛陷趙州初六日賊已棄正定由藁城渡河東竄百姓紛然逃者啼號不絕初七日平明公召州判曲阜顏君錫敏為守禦計方促晨餐適所遣諜賊者至則賊距城二十里矣公飯如常畢急入內舍瘞藏印勅復出廳事顧顏君曰本欲與君共殄此賊奈勢已迫無可佈置且器械一無所有何必強為掙挫苦我一方民予當以身殉君意如何顏君曰願從公死公喜曰得君為伴志不孤矣未刻賊已至集城下賊初入城戕顏君於鼓樓之內遂入公廨公端坐堂皇厲聲叱曰若亦民也何苦為盜釋兵吾貸汝死賊衆蜂擁登堂刃及公額公仆於座下賊遂縛公置庭樹間百般窘辱公罵不絕口自未至申聲益厲罵至四更許公



氣竭聲嘶賊以遠涉疲乏皆酣睡同縛有民壯柳某潛脫其縛復  
為緩繩結公亦得脫柳某促公逃公麾之使去曰若既得脫幸矣  
我當為我事柳問公將何為公曰我將焚賊汝決不能從我汝可  
速行柳乃逃登城未幾已見衙署煙燄肆起時賊已驚覺呼救火  
者喧闐滿城柳某踰城出而公竟復為賊縛仍置諸庭樹間復有  
州人吳某同時被執後亦得脫見公瞋目罵賊氣僅絲屬賊眾攢  
刃向公公屹不為動罵益刻賊刃中公腹公瞪目不能語賊首命  
羣賊棄公署側積水中公遂卒此皆吳某所目擊者後冀州牧葛  
公獲賊偽帥研訊在深州事據供夜半舉火亦歷歷如繪九月二  
十日賊去深州東掠滄渤時公長子

清臯

自京聞信遄歸得公屍



於塘側適得佳楹於大紳石氏殮公如禮大府以公死事狀奏得  
旨加道銜從優議卹並准於死事地方建立專祠以昭忠節  
賊竄後停公櫬於博陵會饒陽令秦君慨然念同官苦節約同武  
強令余若各助重貲俾清舉奉廣柳以歸窆故鄉斯時有山陰王  
君蓮伯適主講深州書院為作殉難記以誌顛末云噫公之少時  
有睥睨一世之概舉業而外復長於詩著有旅蘆老屋吟稿退耕  
堂詩集若干卷楚游集五溪游稿皆楚省趨庭時所作每構一詩  
必具拔山舉鼎之雄直於王漁洋施愚山外另樹一幟生平尤以  
廉節自勵故宦轍所至囊橐蕭然至其臨難捐軀忠烈之氣震爍  
而不可磨滅非所謂得天獨厚者耶嗚呼如公者處則為名儒仕



則為廉吏沒則為忠臣不誠足以摭拄綱常扶持名教也哉

堂稱... 本報... 款... 均... 音... 許...



第十四世少尉湘漁公

公諱作敬字湘漁綬甯令秋江公第六子也幼具卓識博極羣書少時隨侍楚南即援例得議叙縣尉故不復應童子試工詩古文詞鄉里知名嘗結文社於有九思齋同社大都破壁飛去而公別秋闈屢試薦而未售後遂絕意功名娛情筆墨恒與同里黃韻甫變清輩詩酒聯吟極觴詠之樂泉唐李鵠如本仁故交也開藩皖省招司筆札為草時務四條上之得見施行冠氛告警由皖旋里行篋沈於江所著詩文稿盡皆失去咸豐辛酉遭粵匪難室廬被燬流離遷徙抑鬱以終一子佳彪弱冠游庠棘闈報罷勸學過甚積勞成疾未婚而卒



第十五世別駕甸華公

公諱燿字甸華號頰齋永凝牧潤之公長孫明經斗生公子也少  
個儻負大志讀書穎悟過人補諸生後援例授太常寺典簿行走  
為上憲劉公鳳誥所器重嘉慶辛酉應京兆試卷已入彀會主司  
與房考意見不合填榜時易去改授府通判分發湖南試用歷署  
衡州常德通判長沙府同知所至有政聲任長沙同知時適知府  
下鄉勘灾代理試事搜剔積弊一時錄取皆寒畯咸服其能知人  
丁艱歸籍杜門不復出矣待諸弟性友愛課子讀書日事丹鉛生  
平以敦本為亟先世有公田數十畝經理擴充立為祖訓公產俾  
祠下子姓讀書應試者費有所仰給壽六十四邑志見人物傳



第十五世茂才懌山公

公諱高俊號懌山春帆公之子性落拓不問生產詩書過目不忘少年即絕意進取雖獲青一衿而於科名淡然也有書畫之癖工八法擅丹青聞有佳書畫無不索觀先世所藏渤海藏珍帖臨摹殆遍而最好蘭亭摹寫逼肖其畫山水也邱壑藏胸隨意揮灑筆底有烟雲之致凡所摹仿幾於亂真而宗尚大癡故晚年自名曰亦癡身佩筆墨圖章遇有求其字畫題跋者無論何地援筆立就又精堪輿術恒以營葬勸人邀請相地遠近輒應生平食量頗大而衣服不事修整嬉游於廛市之間形骸放浪和藹可親其曠達也如此吾族自香泉太守以書名世繼香泉太守而起者其惟公



乎至今人得其寸縑尺幅莫不珍如拱璧云年六十七無疾而逝

（Faint bleed-through text from the reverse side of the page, including characters like 長, 尺, 寸, 縑, 尺, 幅, 莫, 不, 珍, 如, 拱, 璧, 云, 年, 六, 十, 七, 無, 疾, 而, 逝, 公, 對, 山, 公, 對, 山, 公）



第十五世睢甯令雲伯公昌化教諭聲叔公

公諱咸慶字雲伯山陰教諭寶摩公長子也生性渾厚持重樸實不華綺歲以詩鳴阮文達公校士兩浙曾以做宋畫院製扇命題公詩最工遂蒙畫策之贈承平佳話艷絕一時弱冠入邑庠詩文邃邁下筆規繩矩履如大匠掄材胸中暗有繩墨自立一派不屑屑依人門戶著有紅蕉館詩文集若干卷嘉慶庚申科膺鄉薦禮部三試不售以大挑知縣用籤發南河當差治河有聲大憲頗為器重奏准歸部銓選癸酉冬值山陰公六十介壽告假歸里次年春山陰公病歿公哀毀逾恒守禮三年不入內室服闋入都候選仍發江南先署江都令既授睢甯縣知縣遂奉沈太孺人之任時



南河險工叠出民不聊生請帑築堤籌款施賑方冀展佈才猷不料天不永年任未滿以積勞致疾於道光二年卒於任時年四十三歲 府君諱鶴字聲叔山陰公仲子明經子實府君嗣子也府君倜儻豪雋瀟洒超脱弱冠入邑庠兄弟友于甚篤讀書行文各樹一幟而又互相切磋詩古文詞無不擅場著有碧琅館詩文集 中嘉慶戊辰科副榜為盧文和公所重聘往江南學署閱文癸酉年事竣值鄉試歸里是年又復報罷行裝向未在家三月息值山陰公六十初度暫息行肩次年山陰公歿哀慟逾恒平時喜飲劇談守禮三年不苟言笑與素行迥異尤人所難也洪稚存先生與山陰公最莫逆不時以詩文會叙及公歿時年逾八旬猶親來弔



言見府君謂曰老成凋謝尚有典型而季常不愧雞羣之鶴其見重如此服闋至京考取武英殿校錄時盧文和公已入相直樞廷延辦摺奏府君擬就京職為例所格不果後選得遠省通判以道遠親老告近改注教職旋聞伯兄雲伯公卒於睢甯任悲雁行之失序戀慈幃以縈心欲罷不能出京乏術留京值差前後八載選得昌化縣教諭不遑於心擬再注銷既思萱庭失侍隨作歸計及至昌化任山僻小縣士民朴陋無可展佈抑鬱不得志次年驟得咯血症卒於任時年四十四歲

贊曰二公均為寶摩公令子世有大小蘇之目文章經濟炳耀當時名公鉅卿莫不虛左以待晉之二陸宋之二鄭豈得媿美於前



哉嗚呼實命不由未遭際遇而身先不祿天既生之胡為厄之吾宗之不振天實為之乎

此等文字皆平白直說其理  
正當此等山崩地陷之時  
此等文字皆平白直說其理  
正當此等山崩地陷之時  
此等文字皆平白直說其理  
正當此等山崩地陷之時  
此等文字皆平白直說其理  
正當此等山崩地陷之時



第十五世太學午莊公明經輪香公

公諱蔭清號午莊少宗伯匏廬公之五世孫文學丹巖公之長子  
嗣和鳴公後早歲得哮喘疾遂廢書咸豐庚申粵氛告警奉父母  
公及母潘太孺人避居武原鄉祖祠而已則游滬以謀菽水父母  
相繼歿公聞訃毀甚因寇日急遂挈眷赴滬而已涉北洋出沒洪  
濤巨浪間者有年事平返里舊廬毀壞亟修葺之復以積資營兩  
世窀穸公素友愛兄弟同居纍數十年如一日經理祀產董義莊  
事族衆咸服其公生平善書畫晚年喜習董文敏帖時繪松柏取  
後彫意他如歧黃青烏靡不通曉以餘藝弗尚焉歲壬午改築謝  
侯公祠工未竟而卒年五十有九公弟金鑑號輪香生十一齡而



丹巖公自滇游還即稟承庭訓復歷從名師游顧素有心悸疾每  
試輒發故困於場屋甫游庠即遭寇亂流離中猶不釋卷四赴鄉  
闈不售以明經出庠老尤嗜學角藝輒達旦不寐教授數十年循  
循不倦門下多知名士念大宗無嗣慨然以子其謙後午莊公訓  
以義方得膺鄉薦終身絕不干謁當道從無隻字入訟庭書法酷  
肖匏廬公乞書者踵至無不立應工於詩而不留稿自謂無足存  
其抑遜類如此公養親孝事兄敬持已嚴待人恕生平煦若春風  
從無疾言遽色兩弟婦守志一從姪幼孤皆善視之壬辰公年六  
十有五手撰自叙及未雨記是秋疾卒臨危以未及課孫讀書為

憾焉

卷十五廿六學子孫公門



第十五世明經月峯公

公諱高明號月峯建亭公之子生性廉介不苟取與自幼聰穎弱冠補弟子員建亭公素有肝風症時作時止不能治生產故家計甚窘公游庠後即遭粵匪難流離遷徙仍不廢學肅清~~後~~故居被燬無地立錫僅藉課徒以資養膳乃叠遭親喪又賦悼亡遺一子尚幼稚數年間境遇坎坷親友無不代喚奈何而公則強忍自持不作乞憐之態將其子寄育於堂兄德齋家借其屋以授生徒絃誦一堂翬然自得課餘之暇博覽羣書經學理學外旁及天文輿地歧黃風鑑而尤究心於算學嘗謂笙曰自五世祖宋齋公勾股述勾股引蒙二書出採入四庫全書為習算之捷徑是算學乃吾



陳氏家學焉今此調不彈久矣吾故研究焉以冀家學之傳也然  
即因是而得咯血症同里徐侍讀用福聞其名延課其姪士培公  
喜曰吾家遭劫書卷蕩然徐氏藏書富可以恣我遍觀遂携其子  
就館於徐氏暇輒博觀流覽故其學日益進光緒丁丑歲試以取  
筭學食餼於庠然親柩未葬戚戚於心會有人知其意請讓廩缺  
助以葬資公欣然允諾藉以妥雙親焉後其子家騏己丑入泮無  
力畢婚筮代為營謀以成其事然公雖艱苦備嘗而幼學不怠故  
舊症時作至光緒庚寅卧病數月纔得一孫即溘然而逝故僅見  
其門人徐士培采芹而已不及見其登賢書矣伯仲行惟筮交契  
最深時以學問相切磋見其持躬之正秉性之廉好學之篤為近



時吾族不多觀之人故為之立傳以誌其梗概俾後之人聞風興起焉



第十五世世襲雲騎尉增貢生介石公

公諱賡笙字聲叔號介石綏甯令秋江公之孫深州刺史 贈卹  
道銜笠雨公叔子也公生甫四齡刺史公即殉難深州時公及生  
母張宜人避居民間越明年隨張宜人扶刺史公柩千里回籍維  
時家境益落賴宜人針黹得活咸豐辛酉二月鹽城失陷公被擄  
明年自賊中潛歸未及一載復被賊擄至杭垣嗣官軍圍攻省城  
賊力怯偽北王率衆降省城恢復公得生還從此母子重聚相與  
涕泣零丁孤苦饕餮時虞不給而公則孜孜於學恒輟夜不倦丁  
卯張宜人棄養公以劬勞罔報痛不欲生經戚黨勸慰始安己巳  
服闋補博士弟子員公自念簪纓世胄繼志彌殷而省試十餘次



卒不獲售遂絕意進取設帳授徒時族姪子莊觀察以公廉能委以義莊事邑人徐次雲中翰知公敏幹凡地方公益事務無不舉公襄理自是完義莊辦善舉凡邑之保甲平糶育嬰積穀遷善等靡不殫力為之庚子拳匪亂作東南尚靖公獨注意團防蓋公幼遭洪楊之劫歷盡艱苦知亂惟防之於先否則擾攘何堪辛丑秦晉順直大災邑令嵩公請公襄辦賑務公籌得鉅款當道器之為給見義勇為匾額嗚呼綜公生平行事亦見義勇為而已是能視公事如家事若學校若善堂若建邑廟若諮議局初選舉事務所諸務邑人及當道均強公任之然公之積勞亦自此始先復後杜門不出凡地方有事諮詢者均以病謝絕日維詩詞自娛著有倚



山樓吟草四卷癸丑秋掃墓至始祖祠族人公議重修宗譜推公  
董其任公亦念吾族宗譜年久失修心益滋歎遂應衆請勉任其  
事第族巨丁繁採訪匪易凡族人之遠居他省者公先以郵函往  
訪務得其詳然一人之心力易竭通族之見聞難周越四載譜甫  
告成而公竟以疾卒閤族哀之

贊曰惟公之才為鄉之望惟公之德為族之光此生雖未膺夫軒  
冕而歿當祀以馨香

第十六世廣文琴齋公

公諱其泰字靜卿號琴齋山陰教諭寶摩公之孫睢甯令雲伯公  
長子也公幼具宿慧讀書十行俱下九歲能文十五受知於山陽  
汪文端公廷珍入郡庠公天資高敏文筆雄健勢若建瓴不可遏  
止詩古文辭無所不長劇談時事議論風生經濟文章淵源有自  
歲科試屢冠軍食餼道光丁酉學使者欲以優拔貢成均例由學  
官舉優行索贖奢公不屑為不果為娛親計援例以訓導候選歷  
署泰順雲和長興等學諭訓均為大吏留而不赴監省城詰經精  
舍紫陽書院事前後十餘年士子景仰輿論翕然從學者百計皆  
一時俊傑也道光己亥科中第三名舉人禮部再試不售遽歸時



祖母沈太孺人年逾八旬母顧太孺人年亦花甲食指漸繁家道中落公藉幕為養親計當道欽其聲望莫不倒屣歡迎在撫院記室幾二十年道光中海氛惡大帥規復甯波獲間諜不即殺欲令為內應杭城間諜公行公曰此為寇謀不殺必貽後患密與大府籌之杭之間諜不得逞而大帥卒受紿債事黃公宗漢撫浙與公最莫逆以公熟於地勢籌辦漕糧海運事公歷指海道口岸島嶼沙線設局津滬運載沙船籌畫精密如示諸掌以摺稿呈黃公繕以入奏奉旨飭部議大部猶豫未決黃公會同江蘇囑公再草一摺入奏另上大部條陳數十則始奉允行皆公一人主其事及事成黃公以公賢勞彰著欲為疏薦公以此舉近私有傷公論今

能盡心力以報知己並於吾浙西官民有益於願足矣薦舉非所望也黃公擢任兩廣邀公偕行公以親老辭咸豐癸丑粵匪陷金陵勢將及浙公創議遠守皖南與大營聯為一氣故戊午之警賊未敢驟入而大營救兵亦速至繼以籌餉艱大府數更代專守杭城而卒以坐困其在浙事可言者如此咸豐庚申寇至公奉母顧太孺人雜稠人中出時太孺人年已八十其冬疾終公哀毀逾恒次年海鹽陷冢婦季女慘遭賊難公時在滬南鬱鬱不舒通州徐公宗幹撫閩過滬偕公行值臺灣亂勢日張公言於徐公曰宜及內地無事速平之徐公然其言易鎮道益兵力商諸總督左文襄公調林提督文察趣勦叛賊臺灣平而浙江之賊已自江西闖入



閩境矣公至閩已病感徐公知力疾治文書徐亦憫公勞令得代者然猶時時卧理病日益劇於同治甲子七月十日卒於閩時年六十七歲以子德喆官贈奉政大夫初公既負時望性復豪曠讀書論古今事必揭其成敗得失暇則徜徉山水詩文自娛常中秋試畢乘月攜眷屬泛舟六橋至孤山登放鶴亭人望之如仙公之賦性倜儻也如此公初就禮部試在京之名公鉅卿聞其才莫不欲羅致門下及報罷亟做裝歸凡宦京之姻族世誼挽留甚切屬待際會公深憂重幃倚閩趨歸惟恐不速公少遭憫凶叔伯早亡凡仲兄弟之幼稚失怙者則覆翼之公之孝友敦篤也如此公再試禮部報罷歎曰吾家自高曾來績學鮮捷南宮者吾得繼五世

書香幸矣敢望科名出祖父上乎因不復試公之性情冲淡也如此公之出就蓮幕也人謂之曰以公之才苟納粟為牧令大府必器重監司必折節何必高尚其志作依人計乎公曰否余非卑牧令不屑為也今世途日艱世風日下凡牧令須掣定所司地遇上司賢猶可循吾道遇一不肖動輒得咎欲進不可欲罷不能非若幕之有益於國計民生者陳之不能行吾道則去之去留可以自主也公之嚴毅不阿也又如此然公一生際遇苟可少貶豈止終其身一記室已乎而公則別具會心也生平著作甚富有行素齋詩文集行素齋子史劄記琴齋隨筆等書數十卷未刊燬於兵燹士論惜之



贊曰今之幕府即古之記室也文章經濟不能高出儕輩何足以  
佐大府治一省之兵刑錢穀乎當世偉人如湘鄉左文襄公合肥  
李文忠公嘉興錢尚書應溥安徽劉總督秉璋皆由蓮幕以當大  
任彼則售其願而公則終其身豈公之才不若耶蓋遇不遇天也  
其時不同也非人力之所能為也公若少務進取何遽不若人耶

第十六世廣文巽齋公康齋公

公諱其誥號巽齋昌化教諭聲叔公之第三子也自幼失怙承賀太孺人母教兄弟賴以成立弱冠游庠即藉硯田所入以奉甘旨嗣遭洪楊之亂雖饕餮不繼而立志彌堅同治戊辰以冠軍食餼歲科試列一等者十七次而鄉試屢薦不售歷經文宗獎勵勿以科名挫折為懷至光緒壬午循資考授歲貢就職候選訓導生平敦品勵學為儒林所宗仰門下士登科入仕者指不勝屈停車問字不乏傳薪桃李公門一時稱盛世務絕不攪心自號息耕老人著有息耕文集四卷年逾古稀猶與二三知己及門子姪講求道學以娛暮景斯真為誨不倦者矣弟其晉號康齋與兄其誥同受



母教自幼天資穎悟讀書過目不忘道光壬寅入泮後遂游蓮幕  
洪楊亂作銳志從戎咸豐己未隨段光清廉訪贊襄軍務初次克  
復嚴州軍功保舉訓導加國子監典簿銜肅清後歷署杭州新城  
紹興嵊縣訓導兼署教諭迭充崇文紫陽書院監院訓迪士子孳  
孳不倦經學理學外旁及天文地理算術醫學無不通曉著有算  
學雜草對數述康齋醫案諸書已刊刻行世地理一道尤蜚聲遐  
邇省垣人才薈萃凡列門牆學專科者皆名於世董理省城育嬰  
堂數十年手定規則成效卓著光緒壬寅科試適值入泮花甲一  
周學憲特書重游泮水匾額以贈又歷四載而卒壽至八十有三  
葬於留下之大荆山麓即公自營之生壙也

第十六世義烏訓導誠哉公

公諱基正字身修號誠哉封承德郎斗生公之孫長沙司馬頴齋公第三子也秉性穎異甫四齡即能諳聲韻年十八受知於學使史蘅塘侍郎補博士弟子員旋奉司馬公諱哀毀骨立戚黨稱之惟時家境清寒設帳授徒硯田所入悉供甘旨頗能得生母劉宜人歡服闋後為昆明趙蓉舫學使所激賞食餼於庠歲科兩試均列優等文譽鵲起咸豐紀元黃壽臣中丞撫兩浙都人士剏舉義塾耳公名延請掌教公盡心督課誘責兼施多所造就及門如仁和桂子華高念曾錢塘俞秉炎餘枕李炳垚皆先後登賢書人咸服其教育之功而公則省試十九次累薦而未售知者每深扼



腕公自視淡如也庚申赭寇竄東南棄館回里時公弟基開宦游  
粵東來書相招公遂奉劉宜人航海避難壬戌自粵歸癸亥廬江  
趙曉溪觀察收復邑城延請襄辦善後局事事無鉅細必竭心力  
邑人稱之甲子春廬江潘琴軒中丞誓師雲間邀公入戎幕隨營  
防護天津蒙合肥李文忠公兩上剡章奉旨以訓導用並恩  
賞五品藍翎乙丑援師山左適聞劉宜人訃公遂千里奔馳赴喪  
扶櫬回籍自此不復出矣先是司馬公解組歸有祖遺公田數十  
畝經理擴充立為祖訓公賡俾祠下子孫讀書應試者費有所給  
自遭匪亂幾於廢墜公家居數年力為整頓悉復舊規適族兄子  
莊創捐義莊囑公經理其事每置產公必選擇莫垂久遠基開公

歿於揭陽官舍公聞耗即星夜渡海移柩歸里蓋友愛其天性然也光緒甲申冬部選授義烏訓導公自念先世累受國恩身雖冷官力圖報稱况義邑為先毅庵公司訓故地遺碑尚在繼志彌殷秉鐸五載盡心啟迪與諸生講解切磋無間寒暑學中如朱郁荃王夢松皆公所教育而成材者也義邑自兵燹後文廟傾圮尚未建復甫蒞任即與同寅蕭山王省之學博商請籌款啟建首先捐俸以創鳩工庀材不辭勞瘁越三載而告成邑人勒石以志勿讓己丑縣試邑侯吳槐卿大令因病申請府憲委公代理試事搜剔積弊一時錄取皆知名士是歲四月以積勞卒於學舍壽七十有一嗚呼公之一生惟以清操自矢不恃氣不矜才待物以



誠持躬以儉故轍迹所至每為名公卿器重而桑梓尤切敬恭凡  
遇宗族戚鄰之急境雖貧必稱量而予其亮節至今猶稱道弗衰  
云

第十六世觀察子莊公

公諱其元字春澤號子莊同安令 贈通奉大夫冠山公仲子也  
公六世祖范齋公奉父命遷居石門遂占籍焉族人稱為石門支  
公幼而穎異十五補博士弟子員經濟文章早負時望撰策籌邊  
為林文忠公所稱許聲譽鵲起名動公卿時公祖太平府丞心吾  
公卒於任冠山公丁憂歸里家計中落公授經為養旋貢明經省  
試十五次而不售以保舉議叙訓導選金華府擢富陽教諭在官  
十八年以德業訓迪士子無不感奮值邑災勸捐振窮黎受惠歎  
無虛糜無何粵逆蹂躪江南浙壤紛擾公竭力守禦以功升知縣  
賞花翎及省垣再陷公已注官江蘇李文忠公檄募偏師規復甬



東公亟請贈公避兵滬瀆贈公道逝遽羅憫凶隨入幕府參謀軍  
事繼佐甯紹台道史公治軍浙東左文襄公督師入浙以公才能  
膺首薦超擢直隸州牧仍發江蘇公與大吏晉接莫不刮目相待  
委司海運筦權稅檄署南漕令所至有政聲屬有番舶載石煤觸  
礁舟覆民爭拾漂棄洋人以焚掠告百端要挾責償巨萬公堅拒  
之時丁公雨生撫吳壯公吏材移權青浦旋署新陽未幾調上海  
上海素稱繁劇華夷雜糅事無鉅細牽涉外交公據理直陳不難  
於勢用是聲望日隆大吏歷舉晉階知府加秩道員又晉三品銜  
加二品頂戴然公秉性恬淡作吏十年遽然引退江省大吏均稱  
公為循吏挽留甚切而公不顧也公以石門故廬毀於兵燹卜居

桐鄉優游林下不肯以瑣事謁方面凡事關鄉邦利弊則竭力為之自奉儉約而與人無恠叛義莊於海鹽以贍族之貧乏擇族中明幹者經理之晚年著庸閒齋筆記以自娛於掌故事實無不詳備深有裨於考據光緒辛卯疾終年七十宗黨傷之贊曰漢之循吏稱龔黃非以其三載考績稱最而已也公勇足以幹事誠足以格頑豈愧於古之循吏耶左文襄公獨重公以乞就教職謂有古廉吏風似未足以盡公一生也



第十六世 封中憲大夫國學子迪公茂才子耀公

公諱其旋號子迪進士南圃公之孫允齋公之子早慧穎悟絕倫七八歲時母朱太恭人即授以四子書緣允齋公抱病經年不能督課家貧無力延師九歲失恃佐兩姊理家政井井有條客至應對已如成人嗣以急謀生計棄儒業賈偕弟子耀營業於乍浦距家路三十里月必徒步而回問安數次兄弟輪流往來無間繼母張太恭人生子女各一兄弟二人不以異母漠視咸豐庚申粵匪之亂舉家遠避寇退回里賊又猝至迫不及避乃奉父母弟妹奔竄遇賊擄公與弟子英行公即以身帶銀元獻賊遂縱公而留子英并云如再獻可並釋公諾乃尋覓父母泣訴取銀往贖父母阻

之曰時值亂離汝弟子耀出外謀生死生未卜今汝兄弟被擄我  
恐祖宗香烟斷矣汝幸得釋豈可再入虎穴公謂賊亦人情當不  
爽約堅請持銀往竟偕弟回翌晨賊即退子耀亦聞警歸乃得團  
聚相與遠遁至紹興某村適辦鄉團者頗專橫至戚朱雪篁孝廉  
為其所困公設計相與同行乃未及一月是村失陷矣允齋公以  
老年遭亂困苦不堪致病腫脹不起公與子耀侍奉湯藥衣不解  
帶者累月兄弟友愛逾恒子英患心疾中年益甚衣服垢穢不自  
知公必自為更換之晚年篤行善舉經辦積穀掩埋十餘年不辭  
酷暑不避嚴寒事必躬親纖細靡遺年七十以疾卒弟子耀諱其  
鎔年少習賈性酷嗜學遭亂無力經營乃入米肆依人作嫁日持



升斗夕誦詩書親友勸其應試縣府均列前茅院試後回店任事  
時值炎暑親蓋涼棚正登高處束絢而報捷人適過其下仰見公  
曰公已高擷芹香請急歸無事此公夷然結束如故事畢歸家從  
容不迫後乃以教讀供事畜其天性過人送弟子英赴院試弟適  
患河魚之疾不及解衣而遺矢出場後親自代易兼為澣濯不嫌  
其穢弟獲雋喜甚外甥張麟祥少孤無依教養之不異其子治家  
尚整肅子女六七歲倘拜跪失度洒掃失時即譴責隨之嘗謂少  
成若性不可不端其始云學祖朱程一舉一動必循規矩而尤以  
居敬行簡為歸閭里聞風興起頗足以敦末俗而挽澆風惟少年  
習勞過甚血氣早衰年三十七遽以疾卒未竟厥志也惜哉

十六世候選州同通奉大夫葆齋公

公諱其泉號葆齋禮部儒士稷堂公長子也師事表兄陸建堂孝廉時洪秀全踞金陵未下江南北營寨相望公厯入潘鼎新趙

二公幕參襄軍事極荷倚重迨江浙肅清公以二老倚閭望切即馳歸省同治乙丑補行庚申科補博士弟子員已年逾弱冠矣蓋公固不斤斤於舉子業重違親命一應童子試也性澹泊敝屣榮利壯歲即淡於進取承歡菽水恬如也嗣子莊觀察捐義莊公主謀其事督造莊房及大宗祠宋齋公祠風山公祠鳩工庀材以底於成兵燹後各坟墓多圯損公植坟蔭立石埠芟刈荆棘修葺而整理之嘗理貞齋公祭產竭誠如家事光緒壬午年議修宗譜





第十七世直隸候補道附貢生香齋公

公諱德雱字舞仙一字香齋其泉公之仲子也天姿英挺幼好學  
逾常博淹經史恒午夜不釋卷甲申年弱冠應童子試屢列前茅  
見賞於學政劉汝梅先生以第二名入泮聲蜚黌舍乙酉鄉薦戊  
子秋官試第三場以病不能入闈而首二場已入選限格不獲售  
公性曠達不斤斤於科第庚寅北遊燕都徐用儀宗伯羨公博學  
延課子讀旋納粟得以縣令用越二年駐美日秘公使楊儒奏調  
派充舊金山副領事任滿擢同知加四品銜籤發江蘇任用時黑  
龍江將軍薩慕公才奏調到黑委辦審理紅鬍子案紅鬍子者黑  
省鉅匪也結黨千百焚掠贖擾民不得安居公憐陳大吏殲魁



宥從勦撫互用不以羅鍛為能寬縱為德旋委充漠河金廠提調  
漠河為黑省著名金礦董廠事者咸滿載歸屬吏所欲求不得之  
優差也時值初辦百度草創省吏知公廉能委公往任二寒暑公  
挈鉅持細臂畫翔實除廉俸外不私蝕得遷知府壬寅駐西班牙  
公使許珏調充參德公臂助保擢道員加二品銜丙午時袁前總  
統任北洋欽差大臣以公熟諳外交調委督署洋務處總文案深  
加器重於公袁公以公機敏練達將薦大用而竟以肺病歿於天  
津客邸時年四十有三

十四世張節母

節母張氏天津人

欽卹道銜深州知州櫟餘公之副室也明大義寡言笑年十六歸于公時公繼室蔡恭人逝世內助乏人且庶母篤老節母入門後襄理內政井井有條生子女各一隨侍任所公深任之咸豐癸丑寇氛告警公以殉國自期而母亦誓以身殉至九月賊將逼城節母承公命扶庶姑携子女雜民婦中以避難迨聞公訾賊遇害而母一慟隕絕庶姑救之得不死乃諭之曰公以大義殉國而幼子弱女惟汝是依苟一失所何以慰泉壤心母因收淚忍哀慨然曰先主有子三人長既出嗣次復即世留此四齡孤敢不盡心撫育以承公祀旬餘寇退適嫡子涓自京師聞



信歸同入城檢遺骸殮如禮扶櫬還鄉方是時也公以清介居官  
宦囊不名一物况復羅患遘凶幾難存活而母則上事適姑下撫  
穉弱日勤操作夜則篝燈課子諄諄以立身成名克承先志為訓  
洎乎辛酉寇陷鹽城子擄姑死室廬被燬母痛與憤并幾不欲生  
回顧幼女心復惻然乃携而竄諸鄉日食粗糲不得一飽而思子  
心傷無一日不以淚洗面也同治甲子子王師南下浙氛肅清其子  
賡笙以事平得歸會里人創設崇德里塾課書香子弟母因緣得  
送子入讀焉女既長適本邑生員徐廷楨而母之心力已交瘁矣  
丁卯三月 賡笙 方應縣試節母始一解顏詎料積年勞苦一旦疾  
發遂不可救卒年纔三十五歲節母外溫厚而內方嚴出艱入險

志  
十餘年其志不少挫焉厥惟艱哉光緒丙戌當事題請  
予旌入



第十五世 封孺人賀太孺人

太孺人姓賀氏海鹽孝廉諱光祚女也年十五歸昌化教諭聲叔府君貞靜幽閒四德咸備明大體無瑣屑女子見府君為寶摩公次子出嗣明經子實公為後子實公早卒府君偕太孺人奉侍嗣母查太孺人克盡孝道府君丁本生外艱後入京考取武英殿校錄留京值差八年無歸太孺人獨奉嗣姑并兼子職查太孺人出自名門席豐履厚迥異荆布之風性又嚴厲太孺人奉事惟謹柔順無忤幸恃府君寄供菽水強以支持及府君奉大部選授杭州府昌化縣教諭泄任後地僻山居民愚俗陋府君抑鬱不得志不二年而歿於任遺四子二女長茂才公諱元義奉本生祖命出嗣

序隨出游幕二女亦嫁名門查太孺人卒太孺人盡哀盡禮殯葬如儀不以境窘而稍薄焉本生姑嫜沈太孺人慈愛甚摯太孺人定省無缺時奉甘旨琴齋公以祖居人衆奉沈太孺人遷徙南門新居太孺人雖異居月必手製甘旨而奉焉沈太孺人止之堅不聽雖境窘而歷久不懈及沈太孺人歿後太孺人逢節必親淪邊豆而致祭至死不少哀三十年來艱苦備嘗雖境迫時窮未嘗向宗戚借貸口中亦不道貧乏氣體素旺身鮮疾病其時諸子成立兒孫滿前可以含飴自樂矣詎料天不祚年於道光庚戌五月卒時年六十有二歲

贊曰德鎔之生也距太孺人歿之年已八易春秋矣故音容未嘗



親接惟聞伯叔嚴父之言稱道太孺人凜冰霜志堅松柏教諸子  
也勿替先業有中山張氏之風侍嗣姑也感悟慈心有伯高趙婦  
之德宜乎家聲克振懿德懿行有以致之吾宗夙著壺則炳耀譜  
牒太孺人當之庶無愧云爾

第十五世沈孺人

孺人姓沈氏國子監典籍宇聞公繼配也少聰慧通經史夙嫻禮法及來歸猶及侍兩世尊章佐理內政允稱賢淑顧體素羸弱每夙興問安太翁節亭公憐其勞瘁於樓梯中間為置一橈以便歇息其克盡婦道得老人歡心如此無何兩世尊章相繼棄養孺人竭力措支喪葬盡禮旋遭兵燹倉卒避難時子女均在孩提流離轉徙艱苦備嘗事平回里故居御賜玉箴堂第宅被匪損壞孺人力助宇聞公修葺漸復舊觀未幾宇聞公卒子昌壽昌祺均幼孺人守節撫孤含辛茹苦教養兼至並令出就外傳兄弟先後賦采芹為之締姻授室晚年得樂含飴一女于歸羊氏壻亦名列膠庠



孺人後字聞公三十二年而卒而年已古稀外矣平生粗衣淡飯  
從無珍羞華服而祭祀竭誠物必豐腆性好周濟困乏從不入廟  
燒香其天性固有大過人者因格於例未得請旌然誌其懿行亦  
足為閭範已

第十五世陸太宜人

太宜人姓陸氏諱慧字菴香祖檜布政使經歷父以鈞太學生皆  
績學能詩文太宜人自幼婉婉嫻哦詠家故有半弓園方父客閩  
時母鍾太孺人篝鐙課諸子讀太宜人姊妹紅餘問字唱和成篇  
題曰醉月軒詩集及歸明經輪香公遂停吟管修婦職未踰年即  
避寇亂奉舅姑至武原祖祠中途兩遭胙篋財物蕩然會舅丹巖  
公姑潘太孺人相繼卒皆太宜人稱貸成喪時夫兄午莊公往來  
北洋夫輪香公就館滬上寇急遂挈眷赴滬事平返里修葺敝廬  
復營兩世窀穸太宜人悉內助焉輪香公素有心悖疾授徒數十  
年不問家事一切賴太宜人擘畫雖質簪珥不令公聞也持家勤



儉一以古為法娣姒無間言子儒珍生數月而殤同治丁卯始生其謙教養兼盡以至成人授室而精方自此瘁矣光緒壬辰輪香公逝世哀痛之餘喘疾時作丁酉其謙舉於鄉太宜人曰汝父忠厚一生困場屋天殆有以報之耳戊戌其謙禮闈報罷就職教諭晉五品銜得封太宜人己亥仲冬疾益巖與家人談未竟而逝年七十有二孫男女三尤鍾愛長孫德閔而命以次孫德聞承本生宗祀焉

欽定四庫全書

十六世顧貞娥

貞娥姓顧氏文學桐舫之聘室也世居吳門早年失怙無兄弟依寡母居貞靜不苟訾笑戚族咸稱之初桐舫遭大父櫟餘公癸丑之變隨母高孺人回蘇就外家肄業聞女賢而聘之迨戊己間蘇垣告警桐舫乃侍母回里會嘉郡方府試彖由縣補送入冊府院試輒冠軍入泮逾年以發憤積勞秋闈報罷而卒高孺人憫貞娥之幼而賢也不忍聽其終守婉轉致書俾其改適而氏性素烈母秘之勿使知後因微洩氏聞即仰藥投繯欲以身殉幸戚族環集咸以父故母老乏人侍奉之說進之乃止由是練裳編素儼然以未亡人自待矣比蘇垣失守奉母逃匿鄉間蕩析離居糠粃不飽



母不堪困頓一病而卒氏慟絕復生經紀喪殮族人有欲奪其志者竟仰藥死烏乎氏之志烈矣哉而其孝之純節之堅考之吾族殆不數數觀矣亟傳之以風閭門之有志者氏卒年僅二十歲肅清後桐舫之弟蓮舫領其柩歸合葬之以全其志光緒丙戌予旌事載邑乘



第十七世烈婦王孺人

烈婦姓王氏仁和茂才福昌之女廣文琴齋公冢婦茂才德姓婦也來歸十載婉順有德居恒慝慝媿媿若寡斷然咸豐辛酉二月二十七日賊陷海鹽姑姊及所生子女先他避烈婦與夫暨幼女留守故居聞城破烈婦語其夫曰君第速行毋以我為念我生名門適望族必不肯辱兩家門戶也言未畢賊斧門入茂才被賊傷仆地烈婦知不免時值清明節家祭後多餽餘因給賊曰我一婦人安所從逃厨有酒食盍且醉飽當示藏篋處賊喜烈婦乘賊饕餮潛從破壁入鄰舍自經死時鄰已無人壁在暗陬有陶氏婢從他所來先匿焉見王氏引帶將就縊勸少緩須臾伺隙偕逃烈婦



不可此婢後脫於難為人言之歷歷如繪也烈婦次女安海尚幼  
稚當賊擊門傷茂才時驚哭不出聲而殞同治癸酉年吾鄉徐京  
堂周儀採風入奏以余族中羅賊匪慘禍者十人上聞蒙賜  
建坊祠以褒之

贊曰婦女幽柔寡斷性使然也至臨大難而從容就義訣於片刻  
足見其防閑於平日矣所謂不義而生甯執義以死耳吾宗節烈  
之足傳王孺人其一也蒙賜旌褒其心亦足慰矣

第十七世陳女袁烈婦

烈婦姓陳氏明經巽齋公長女名德芬幼嫻姆訓柔婉寡言長遭世亂隨父母避難至諸暨橫澗村時年已二十四歲矣遂嫁於暨邑袁姓袁某世務農業夫耕婦饁烈婦不辭其勞也咸豐辛酉之春全浙淪陷徧地皆匪袁氏室廬離包村民團甚近初烈婦隨夫避難遷入包村見其異服邪言不願久居偕夫歸家未數日賊匪麇集無可逃矣次日其夫欲偕避山中未行而賊已至烈婦將前門閉之揮夫使去曰速匿後園同死無益也賊破扉入烈婦罵賊求死賊見祇一少婦呼羣賊入而欲擒之烈婦以舂米杵投之中賊傷額羣賊憤怒反接其手懸於樑用火藥焚之賊即去其夫行



未遠見黑焰蔽空以為賊縱火焚屋偵知賊去遠擬歸而撲滅其  
火及歸見烈婦懸樑間氣尚未絕解懸而救之猶能言其狀遍體  
焦黑而樑柱不毀不半日而氣絕距嫁時猶未期年也其夫即殮  
而藁葬於後園亂平後啟土棺殮而改葬之屍身猶未腐云其夫  
僻處鄉間未能請旌同治末來杭與鎔言之時鎔尚幼但記其  
姓并其被難年月亦忘矣因追述其事附家乘以傳焉

贊曰人生不幸而遭亂世遇強暴能從容就義者有幾人哉何況  
一弱女子耶罵賊投杵何其烈也較之投水不躍熾磚不滅者無  
以過之吁慘矣烈婦之死不愧吾宗壺範矣

第十七世烈女貞儀

烈女名貞儀字璫卿琴齋公季女也年二十四歲許字同里朱美  
鏐大令子庾康大令歿於閩庾康服甫闋故猶未娶也烈女不讀  
書而粗知文翰識大義不工針黹而勤操井臼自諸姊于歸後侍  
嫡母治家事未嘗片刻離左右凡有可以代勞者罔弗先也咸豐  
庚申四月寇氛告近嘉郡失陷戚族羣聚為避難計烈女謂兩嫂  
曰寇在門庭將焉避之吾儕不幸而遇賊固不容畏鋒刃以苟活  
即幸而不遇賊亦安能忍困厄以求生乎兩嫂皆聽其言既而轉  
徙數處不得安居仍返城中辛酉二月二十七日賊陷海鹽烈女  
隨母棹扁舟出城聞賊阻前津遂棄舟登岸伏墟墓間而賊已至



見烈女欲掠之烈女曰我有死耳逆奴視我為何如人乎賊環及相脅烈女大罵欲奪賊刀自裁賊持之急且以火藥包置袖中引火欲然曰從我行否即燔灼矣烈女奮身騰擲罵益甚賊不能堪衆及交下遂戕害至死罵不絕口賊亦相顧歎息竟不忍焚其尸而去後琴齋公聞其死為作傳以誌之歎曰吾女可謂不負其名矣

贊曰咸豐庚辛之亂賊擾鹽邑人民之遭慘劫者何至千計獨吾宗節烈最著烈女完亮白之節為吾宗光較之引刀斷指不尤激烈乎與嫂氏王孺人同蒙旌褒烈女可云不朽矣

海甯渤海陳氏宗譜卷終

十五世孫賡笙重編

十七世孫德錦校刊

原譜弁言

世系表

世系之作所以溯源本臚支流也昔我太傅文獻公相唐太宗實  
詳氏譜嘗受詔責天下譜牒參考史傳作氏族志則我高氏統系  
章矣後李義府佞武后燔氏族志更定之世鄙其書弗傳僅歐陽  
氏唐書宰相世系載高氏所出甚晰然間紀世次或無名字將功  
德隱顯異歟太傅至徵士公凡七世舊譜亦亡其名蓋佚於五代  
之亂未若徵士公迄今犁然也傳曰聽遠者聞其疾而不聞其舒



望遠者察其貌而不察其形故唐以前作原系弗表而自徵士公  
迄今作世系表其歷代旁支肇分附載後支系表使後人得以考  
焉

宗法表

記曰別子為祖繼別為宗繼禰者為小宗有五世而遷之宗其繼  
高祖者也是故祖遷於上宗易於下別子者何始遷者也始遷者  
何以為之別子別於不遷者也是宜為大宗大宗者子孫世之絕  
則支子之適子繼之曷可絕焉耳然則曷為有小宗小宗者大宗  
之支子也已支則繼禰矣已父支則繼祖矣已祖支則繼曾祖矣  
已曾祖支則繼高祖矣已高祖支則遷遷者何也尊大宗也為大

宗也者統無窮為小宗也者統其五服耳矣世衰宗法微宗子或不得統族人而支子或祀四世其甚者繼絕之際富貴則爭後之鬼之窶者餒焉吾徵士公至東園公世或長或支東園公始遷海甯所謂別子非歟至于今二百有餘歲大宗一繼高曾祖禰之宗以百十是烏可勿紀故詳適庶之辨謹著代之義作宗法表小大有序親疏有章若夫繼嗣準此宜為後者雖窶必後也不宜為後者雖富且貴何可覲焉

### 錫命上

高之先嘗為四嶽佐禹平水土虞夏之間封於呂裔孫太公望為周師天下既定封太公於齊其命曰東至海西至河南至穆陵北



至無棣五侯九伯女實征之後九世孫僖與管仲合諸侯有功桓  
公命為高氏春秋漢晉代有興者然五等之命無聞焉北齊二王  
唐許公並以殊勳膺茅土而誓命弗傳至宋衛王顯功名澶淵康  
王克肖懋賞豈外戚云乎傳曰人臣以德立宗廟定社稷曰勳由  
周以來高氏世濟其美然千有餘年賜國者五蓋顯承若斯之難  
也今天子銳志平攘有能翼我王室繩祖武者乎故詮次先王先  
公寵命凡十篇以志勸惟楚王三郡王繇恩澤封云

### 錫命下

易曰大君有命開國承家蓋兢兢匪僭焉明興班爵之制三載考  
績無過始錫勳階得封 先世如其官蓋其慎也浙諸邑高氏世

紆青紫寵命相照矣其在海昌奕葉被璽書永貴家史嗚呼國恩  
後哉上所甚慎下所甚慕而不可致者何修而累邀之在名虎之  
命曰肇敏戎公用錫爾祉言能繼厥祖以承王休也我子孫尚踐  
修厥猷竭蹇蹇之節章教忠之志可不勗哉可不勗哉

世傳

甚哉行不可不慎也德厚者流光德薄者流卑書曰厥父蓄厥子  
乃弗肯播矧肯矧晉之藥卻唐之房杜始末嘗不振起東修乃怠  
佚也夫太上立德其次立功其次立言君子將以光先人法後世  
舍三者何以焉吾烈祖勲在盟府盛德溢乎六籍遷祖以來咸飭  
厥躬罔敢隕越然周覽世系或子孫累十百或一再世湮絕無聞



若是者天歟人歟君子疾沒世而名不稱焉非富貴之謂也故述  
歷世行事著於篇以鑒來許自徵士公以前或曠世不絕名字故  
次朝代徵士公以還則次世若夫爵里生卒妻子墳墓之屬必謹  
而記之隆替之理長幼之節亦因以備察焉

大傳

聞之祖有功而宗有德中興明辟百世不祧達乎大夫士庶人何  
異焉史於賢者特書之特書之不足從而詳著其事以揚抗之高  
之先太公敬仲尚矣漢以還世有明德至北齊二王而大顯至唐  
相許公再顯至衛王康王勳在宋祚子孫繼之功德不勝書焉夫  
立人之道曰忠與孝昔我諸祖繼先人之志為宋執節蓋兩得之

及讀北史清河王傳忠烈光日月然亟稱其至孝侍母疾不解帶  
哀毀骨立將根極而言耶先大叅公事神宗數歷中外有闢國之  
功而措紳先生論者謂本諸孝友傳曰孝者所以事君也故詮次  
最著者為大傳其賑九族供墓田蓋孝之屬也得附列焉

### 外傳

自古賢公卿大夫及孝友好修之士蓋罔不有閨壺之助焉是故  
先王示婦禮明婦順又申之以著代以重責婦順婦順備而後內  
和理內和理而後家可長久也易曰無攸遂在中饋詩曰之死矢  
靡他夫履常則潔修蘋蘩變則栢舟之貞流聲彤管甯有既乎然  
或溺枕席之歡虧損慈孝疏間同氣是誰之過歟孔子曰其身正



不令而行哲婦煽而宗周滅後妻昵而伯奇放君子雖欲勿慎惡  
得也昔我宋武烈穆武兩王實毓女士宣仁之德煌煌宋簡今二  
百餘年貞女令妻若接踵而至嗚呼幸哉爰采其可法者著為外  
俾吾宗職刑于者鑒焉

簪纓志

聞之良冶之子必學為裘良弓之子必學為箕世家子孫或降為  
氓隸甕牖繩樞之士往往自致青雲光被奕葉是遵何道哉子曰  
學也祿在其中矣昔先王之制大樂正論造士之秀者以告於王  
而升諸司馬曰進士司馬論辨官材論進士之賢者以告於王而  
定其論論定然後官之任官然後爵之位定然後祿之繇此觀之



上雖甚怒不能用無學之士士雖急仕不能無挾以進亦明矣若夫位之崇卑是有命也君子勿計也昔我先王先公屬風雲之會出將入相功業塞天壤德澤流子孫大哉弗可及已宋時聞以父任起家然甲乙榜代不乏人自國初以來浙五宗甲第相望聞之宗老無不鏤心刺股夜以繼晝克有一日之遇其遇者無不鞠躬盡瘁乃心王室夫遇不遇與天學為可遇與人唐柳玘有言門第高可畏不可恃也美才懿行人未之信一有瑕類指摘隨之凡我孫子立身揚名以顯其親蓋可忽乎哉故輯歷代名爵著之于篇使知所勸勉若博士弟子進之階也故並詳焉

宅里志



高氏家渤海千有餘年而徙燕徙燕時世遠莫可考自燕徙汴當  
宋之初史稱冀國公絜族歸中朝隸亳州之蒙城者也武烈以還  
世有功於宋賜第汴京故高氏以汴著靖康之難武烈子孫或留  
汴或隨高宗南遷家浙之杭州先是神宗熙甯中宰相王珪撰二  
王碑稱武烈子十四人孫遵度等六十三人曾孫士先等一百四  
十五人四世孫庠等七十一人五世孫世祚等十三人夫熙甯時  
武烈孫子或以百十計然則靖康時倍猶未也蓋留者百遷者一  
兵革離析朝代屢更會合無日惜哉惜哉舊譜稱南遷三祖一曰  
修撰文端公諱世英為海昌錢塘之祖二曰修撰公諱世定臨安  
之傳出也三曰太傅忠節公諱世則生石之千之百之居温州千



之居山陰高氏自渤海燕忭入浙凡三徙旣徙浙析為海昌錢塘  
臨安温州山陰五支其徙海昌為菊澗處士諱翥與長子鄉進士  
道隆居邑西之巖門八世孫有諱諒者復徙趙家橋為趙家橋在  
巖門者仍高姓而菊澗次子道安留錢塘為西湖高然二氏子孫  
其相接昭穆未嘗稍假借嗚呼異哉世所稱著姓遂者百年近者  
數十年輒衰息不復冠冕高氏播遷者數矣所至未嘗不為望族  
非烈祖盛德其能干祀而勿替者乎今趙家橋族日以繁子孫比  
屋如櫛容不能容稍稍上入邑若郡城其居四郊者或數十里數  
里相望也故備紀歷代遷徙居止之畧焉詩曰維桑與梓必恭敬  
止吾子孫識諸



邱墓志

嘗讀家語至孔子少不知其親葬處後乃得之五父之衢未嘗不  
廢書而歎曰嗚呼君子可不慎乎先王制為喪葬之禮諸侯五月  
而葬大夫三月而葬士踰月而葬苟或弗葬雖練弗得去衰經以  
此視民民猶有弗葬其親者即葬矣或不免墮壞幸勿壞矣而數  
傳輒不識其處樵牧之所躡狐狸之所嗥可勝悼哉雖有陵寢非  
史籍則不傳而況於家乎宋以前遠不可紀惟史稱兩王葬汴之  
吹臺鄉然穆武而後舊譜不紀葬所即紀多潦畧不可迹故斷自  
遷祖東園公備志其地嗚呼知其地不知其德猶不知也知其德  
而不知繼述光大之猶不知其德也昆孫勉旃祖宗臨汝矣

祭田志

墓祭非古也然而九族燕毛昭穆秩秩墓祭亦猶行古之道也世俗或照支值祭久而弗贍致泯血食墓田容已乎吾遷祖而下墓道人塘北高祖賓暘公墓水塘北舊有祀田中廢萬歷戊戌振塘公白先太常太叅兩公聚宗人興復置田二十畝祠堂五楹四十年二祭無缺則振塘之功多今生齒日繁燕毛或不給苞復聚宗人醵金買田一十三畝合元成弟所助田十畝已四十二畝有奇俟醵金畢再擴他產二墓從此費充矣外如養閒南竹風山諸公墓各有田若干畝或助或置其為孝思一也嗚呼家廟之祭國法四世則祧獨墓祭得上祀數十世而舉國不以為僭其何幸大焉



後之人有能擴而大之祖宗降爾多福苟或廢之凶于而身殃而子孫尚念哉是用詳志諸墓田及規約以告來者

義田志

昔承先開明公治命以中金三百鍰置田歲取租入周宗人之弗能自立者嗚呼開明公於是為不朽矣吾遷祖及今食指數千富者或擁陶頓之業而貧者或短褐不完孰非一本其忍之也自開明公有是命今二十年間窶落之家幸稍舉火矣其法恆於十月朔聚宗人議之某也貧則周之某也猶貧則倍周之不孝及惰佚而貧者弗予即素予必奪是法立而開明公益不朽有聞開明公之風而起者乎予口望之抑貧富何常之有鄉黨有志者往往不



基一錢致貲千萬吾子孫勉旃毋但仰升斗之粟

義學志

古之教者家有塾黨有庠術有序國有學以時考校之七年而小成九年而大成是故在下者莫不學在上者得以藉其用吾氏遠不具論數傳以來以甲第起者九人明經若博士弟子百人非列祖之教不及此夫善教者因其資而道之屬有天幸吾宗人多敏慧好學即弗學往往多藝能是豈患資之不足哉傳曰玉不琢不成器人不學不知道雖有嘉餽弗食不知其旨也雖有至道弗學不知其善也苞不敏以先大夫之教竊祿於朝雖簿宦如水猶有先世之土田在乃割三十畝歲取租入佐義田之不足俟義田少



拓即端以延良師訓九族子弟咕嚕更數年漸曉文義當淑以大  
學苞將更擴他產贍之凡我子弟毋佚遊毋怠惰毋才而驕毋半  
途而廢毋仕而負所學斯善矣

慈塚志

夫王者之道送死與養生均重而古惟材木是需蓋山林自不勝  
葬也江南土狹即斥鹵畝至數金吾宗渡浙以來華溫之室喪墓  
踰侈不足者生則半菽不充歿則一炬為瘞固頽風莫挽要亦計  
無復之嗟乎疇非一本其忍視之耶先是太參府君曾公建祖祠  
門屋形家言不利議毀估值二十三金今以屋歸府君墓用本支  
出田相抵用備掩骼事屬咸宜總以祖宗之澤澤之故命曰慈塚

其田為之遴分取其砂水頗合藏可永安也凡子姓或不能具地  
各照化者尊卑以次序葬其纍裡之費苞更為資給幸勿狃於未  
俗反謂不如付火庶微念不至成虛予日望之矣



後序

家之有譜所以志興衰也興衰之道家國一理同心同德則興異  
心異德則衰統今古以觀瞭如指掌我家中丞公肇修宗譜丁祇  
二百五十有奇距百有六載文簡相國繼修丁增一千三十餘嘉  
慶甲子椒崖徵士三修去二修六十五載又增三百五十餘道光  
己亥節亭明經四修忽減二百餘丁今之修也又減四百餘初修  
與二修相隔百年興奚以驟今去椒崖徵士世僅八十四祀而頓  
減十之四衰奚以疾統計之不禁汗流浹背或解曰粵逆竄流南  
方特甚人民離散萬里皆然第細攷族衆斃於兵與於擄及遭難  
而病歿者祇五十餘人其衰也似不可委諸兵革也或又云代遠



年湮流徙漸衆安知聚族他鄉者不較盛安處故里乎而證之前  
譜始修時已有四支流居之莫攷近代遷流屈指可數其衰也不  
得假諸星散也於是由後溯前體會而得其微意矣吾族當康雍  
乾嘉四朝顯榮鼎盛人情輯睦蝨斯誥緝兆於無形繼是人情不  
古乏騰踏之才而澆漓是習鮮敬收之志以嫉侮為能積習相沿  
心術以壞夫心術者關一己之顯晦為治家之關鍵心術不端立  
朝則紀綱敗傳世則享祀忒幾見侵墓祠廢祀產之子孫有身顯  
支蕃者乎願族人清夜自捫力為洗腆庶康雍乾嘉之盛不難振  
起於一朝噫興衰之理雖曰天道豈非人力哉

光緒辛卯孟冬中澣十六世孫男其泉熏沐書後



後序

家之有譜所以志興衰也興衰之道家國一理同心同德則興異心異德則衰統今古以觀瞭如指掌我家中丞公肇修宗譜丁祇二百五十有奇距百有六載文簡相國繼修丁增一千三十餘嘉慶甲子椒崖徵士三修去二修六十五載又增三百五十餘道光己亥節亭明經四修忽減二百餘丁今之修也又減四百餘初修與二修相隔百年興衰以驟今去椒崖徵士世僅八十四祀而頓減十之四衰奚以疾統計之不禁汗流浹背或解曰粵逆竄流南方特甚人民離散萬里皆然第細攷族衆斃於兵與於擄及遭難而病歿者祇五十餘人其衰也似不可委諸兵革也或又云代遠



年湮流徙漸衆安知聚族他鄉者不較盛安處故里乎而證之前  
譜始修時已有四支流居之莫攷近代遷流屈指可數其衰也不  
得假諸星散也於是由後溯前體會而得其微意矣吾族當康雍  
乾嘉四朝顯榮鼎盛人情輯睦蝨斯誥緝兆於無形繼是人情不  
古乏騰踏之才而澆漓是習鮮敬收之志以嫉侮為能積習相沿  
心術以壞夫心術者關一己之顯晦為治家之關鍵心術不端立  
朝則紀綱敗傳世則享祀忒幾見侵墓祠廢祀產之子孫有身顯  
支蕃者乎願族人清夜自捫力為洗腆庶康雍乾嘉之盛不難振  
起於一朝噫興衰之理雖曰天道豈非人力哉

光緒辛卯孟冬中澣十六世孫男其泉熏沐書後